

Mito Croes nombra den Raad van State

ORANJESTAD - Un par di luna pasa Bon Dia Aruba ya a publica cu Mito Croes ta candidato pa representa Aruba den e Raad van State di Reino. E nombramento a cay finalmente ayera.

E nombramento tabata riba agenda pa basta tempo caba pero e conflicto entre Hulanda y Aruba a tarda e proceso. For di maart e aña aki Aruba no tin un representacion den e organo importante aki. E luna ey Hubert Maduro a retira pa motibo di edad (70 aña). Sr. Croes tin 68 aña pues e por keda solamente 2 aña den e funcion aki.

Conseho di Ministernan di Reina a aproba e nombramento ayera. Sr. Croes tin un trayectoria largo den e arena politico y ta un miembro prominente di



AVP. Sr. Croes a sinta entre otro den parlamento, el a ubica diferente puesto di minister y a traha na Universidad di Antias.

E Raad van State di Reino ta consisti di otro miembronan di e Raad van State di Hulanda y un miembro representan-

do cada otro pais (Aruba, Corsou y St. Maarten) den Reino. Nan ta conseha gobierno riba maneho cu ta concerni tambe e paisnan Caribense di Reino. Por ehemplo leynan y tratadonan di Reino y medidanan en general di e gobierno di Reino. □